



OMLADINSKA BANKA JE OMLADINSKI PROJEKAT FONDACIJE TUZLANSKE ZAJEDNICE

U prvom aplikacionom krugu koji je zvanično otvoren 06.03.2007. godine (pozivom na apliciranje) a zatvoren 05.06.2007. godine (organizovanjem prezentacije od strane aplikantata koji su realizovali projekte), ukupno je bilo prijavljeno 16 projektnih prijedloga različitih formalnih i neformalnih grupa mladih sa područja Grada Tuzle.

Odbor Omladinske banke Tuzla kojeg čine mladi ljudi u rasponu godina od 15 do 20 je nakon procesa predselekcije i intervjua donio konačnu odluku da Omladinska banka podrži 7 projekata mladih u ukupnom iznosu od 2950 KM.

Projekti koji su odobreni se najviše odnose na jačanje aktivizma i volonterizma mladih ljudi kroz adaptaciju prostorija, osposobljavanje sportskih terena, organizovanjem edukativnih kurseva ili pozorišnih predstava.

Projekat Omladinske banke Tuzla finansijski podržava Fondacija tuzlanske zajednice kao svoj Omladinski projekat, na način da pronalazi donatore kao što su Općina Tuzla, Dumfries&Galloway Action iz Škotske, Freudenberg Stiftung.

O pobjedničkim projektima

Na dan 25.04.2007. godine izvršena je promocija projekata i nosilaca projekata koji su u Prvom aplikacionom krugu osvojili grant sredstva. Na isti nad izvršeno je i potpisivanje ugovora između grupa sa jedne strane i Fondacije tuzlanske zajednice koju zastupa Jasna Jašarević i Omladinske banke koju zastupa predsjednica Odbora Anita Šimić sa druge strane. Na svečanoj promociji i potpisivanju ugovora želja nam je bila stvoriti jaku mrežu mladih osoba koje će sutra biti nosioci promotivnih aktivnosti Omladinske banke Tuzla.

U narednom tekstu ćemo dati opis projekata koji su dobili grant sredstva u Prvom aplikacionom krugu 2007. godine:



1.

Naziv projekta: Izgradnja sportskog terena za košarkaške aktivnosti

Nosioci projekta: Grupa omladine iz Gornje Tuzle

Oblast: Sport

Traženi iznos: 700,00 KM



Odobreni iznos: 600,00 KM

Opis realizacije projekta:

Grupa mladih iz Gornje Tuzle je izvršila uređenje postojećeg prostora u svrhu upotrebe za košarkaške aktivnosti. Iskoristili su ukupan iznos od 600 KM za izgradnju betonske ploče, postavljanje koša, te markiranje terena. Zbog potrebe za više finansijskih sredstava, tražili su pomoć od lokalnih poduzetnika, te im je sa istim iznosom kao i Omladinska banka pomogla lokalna kompanija "Menprom" doo. Uloga Omladinske banke je dvojako ostvarena na način da je pružena pomoć mladim ljudima te da su se poduzetnici uključili u rješavanje problema mladih u lokalnoj zajednici.

2.

Naziv projekta: Meti ispred svoga praga

Nosioci projekta: Odred izviđača "KRIN" Tuzla

Oblast: Sigurnost mladih

Traženi iznos: 700,00 KM

Odobreni iznos: 550,00 KM

Opis realizacije projekta:

Projekat "Meti ispred svoga praga" je realizovan u roku od 20 dana od dana potpisivanja ugovora. Naime, preko 40 volontera izviđačke organizacije i 20 stanovnika ulice u kojoj se nalazi dvorište koje je bilo neophodno adaptirati je zajednički udružilo snage i učinilo ovaj prostor pogodnim za igru djece i mladih. Objekat u kome se nalaze izviđači je u ruševnom stanju u kakvom se nalazilo i dvorište, koje je bilo predmet adaptacije. Stara ograda opasna za sigurnost, hrpa naslaganog smeća stvorena od strane nemarnih građana, neuređeno dvorište te estetski neuradan prostor stvorili su potrebu da Omladinska banka podrži jednu ovakvu volontersku inicijativu. Sada dvorište izgleda u potpunosti drugačije i pruža sigurnost ne samo članovima izviđača nego i lokalne zajednice. Ponovo je uloga Omladinske banke bila dvostrana jer je pored animacije članova izviđača uspjela animirati i građane iz lokalne zajednice.



3.

Naziv projekta: Bosansko-turski priručnik

Nosioci projekta: Udruženje studenata fakulteta turskog jezika DIVAN


Oblast: Edukacija

Traženi iznos: 500,00 KM

Odobreni iznos: 500,00 KM

Opis realizacije projekta:

Bosansko-turski priručnik, izuzetno jedinstven projekat, se pojavio kao ideja mladih ljudi, studenta fakulteta turskog jezika koji su imali za cilj kreiranje prvog priručnika na pomenutim jezicima. Kao rezultat ideje i truda ovih mladih ljudi stvoren je izuzetno kvalitetan priručnik na 150 stranica, na kojima naravno počasnno mjesto zauzima Fondacija tuzlanske zajednice sa omladinskim projektom Omladinska banka Tuzla. Ovaj projekat je podržan sa 500 KM od strane Omladinske banke. Zbog činjenice da Omladinska banka ne podržava profitabilne projekte, a da će ovaj priručnik biti



Novosto #1, mart 2008.

prodavan, dogovorena je okvirna tržišna vrijednost od 5 KM te je kao protuvrijednost Omladinskoj banci dodijeljeno 100 komada priručnika koje će moći besplatno podijeliti u lokalnoj zajednici. Ponovno je Omladinska banka imala više funkcija, te je podržala projekat prva ove vrste, okupila je preko 20 sponzora iz lokalne zajednice koji su potpomogli ovaj projekat te joj je pružena prilika da 100 komada priručnika podijeli lokalnoj zajednici bez naknade.

4.

Naziv projekta: Higijenom do zdravlja

Nosioci projekta: Animatorska grupa "OSMJEH"

Oblast: Zdravlje, prevencija oboljenja

Traženi iznos: 453,90 KM

Odobreni iznos: 430,00 KM

Opis realizacije projekta:

Animatorska grupa OSMJEH kao kontinuirani nosilac aktivnosti rada sa štíćenicima Doma za djecu bez roditeljskog staranja. Naime, do sada je realizovano ukupno tri projekta uz finansijsku podršku Omladinske banke Tuzla, te se Animatorska grupa OSMJEH isprofilisala kao izuzetan promotor volonterizma i aktivizma, upravo onoga što podupire Omladinska banka Tuzla. Projekat "Higijenom do zdravlja" se realizovao kroz edukativne radionice na kojima su bile obrađivane teme koje su se doticale higijene cijelog tijela sa posebnim naglaskom na intimne dijelove tijela i ekstremitete a sve to kroz animatorske igrice uz jačanje identiteta svakog štíćenika. Omladinske banka Tuzla, kao donator uvijek će podržavati one projekte koji utiču na razvoj marginaliziranih osoba te osoba sa smanjenim mogućnostima.



5.

Naziv projekta: Pozorišna predstava o zloupotrebi droga "Zašto..."

Nosioci projekta: Udruženje mladih Tuzla

Oblast: Zabavno-društveni sadržaji, zdravlje-prevencija oboljenja

Traženi iznos: 600,00 KM

Odobreni iznos: 420,00 KM

Opis realizacije projekta:



Jedan od jako značajnih projekata koje je podržala Omladinska banka Tuzla u Prvom aplikacionom krugu u 2007. godini je upravo i pozorišna predstava o zloupotrebi droga "Zašto...". Naime, ne samo da su mladi ljudi koji su realizovali ovu predstavu uspjeli privući ogromnu pažnju medija, te na taj način promovisati Omladinsku banku Tuzla, nego su i doprinijeli uticaju na svijest mladih ljudi o štetnostima opojnih droga. Značajnost projekta leži u činjenici da je veliki broj mladih ljudi učestvovao u pripremi i realizaciji ove predstave te na taj način je uspio da pokaže da su pasivnost i nezainteresovanost mladih ljudi u našem Gradu velika laž. Omladinska banka Tuzla, kao najznačajniji donator ove predstave je uspjela animirati i ostale donatore da podrže ovaj zaista bitan projekat za naš Grad.

6.

Naziv projekta: Uniportal

Nosioci projekta: Grupa studenata druge i treće godine elektrotehničkog falulteta

Oblast: Edukacija

Traženi iznos: 360,00 KM

Odobreni iznos: 270,00 KM

Opis realizacije projekta:

Uniportal je još jedna od inovativnih i kreativnih ideja mladih ljudi iz Tuzle, koja se sastojala u kreiranju internet portala za sve studente Univerziteta u Tuzli. Naime, sama svrha realizacije ovoga projekta jeste upravo komunikacija među



studentima u cilju razmjene iskustava, skripti, naučnih radova, seminarskih ili pristupnih radova a sve u cilju jačanja kapaciteta mladih kroz edukaciju. Značajno je spomenuti da je Omladinska banka Tuzla, prva koja je prepoznala potencijal ovih mladih ljudi kao i njihove ideje, a kao dokaz tome jeste postojanje izuzetno posjećenog internet portala www.uniportal.ba koji je svakim danom sve više i više posjećen.

7.

Naziv projekta: Organizacija fudbalskih turnira

Nosioci projekta: Učenici srednje medicinske škole

Oblast: Sport

Traženi iznos: 330,00 KM

Odobreni iznos: 180,00 KM

Opis realizacije projekta:

Omladinska banka Tuzla u svojoj misiji je zabilježila da će pomagati mladim ljudima na jačanju njihovih kapaciteta, a ovakav projekat je upravo dokaz tome. Učenici srednje medicinske škole su organizovali fudbalske turnire s ciljem promocije sporta i zdravog života kao i činjenice da se kroz sport može boriti protiv štetnosti današnjeg društva. Turniri koje su organizovali ovi mladi ljudi su bili izuzetno posjećeni i svjesni smo činjenice da su svi oni koji su bili na turnirima shvatili da je ovo jedan od najboljih načina kako se boriti protiv opojnih droga i alkohola. Kada kažemo da Omladinska banka Tuzla pomaže mladima na jačanju njihovih kapaciteta, činjenice da su učenici prvog razreda organizovali turnir i da im je pružena prilika da to samostalno urade, ide u prilog tome.

Umrežavanje mladih



Omladinska banka Tuzla kroz svoje projekte direktno povezuje mlade u Gradu Tuzli, bez obzira kojoj oni grupi (formalnoj ili neformalnoj) pripadaju. Cilj je kroz neformalnu edukaciju učiniti da se kapaciteti mladih (obrazovni, kulturni, ekološki, sigurnosni) ojačaju i da na taj način mladi postanu razvojna snaga društva uopšte.

Nakon Prvog aplikacionog kruga, sve grupe koje su dobila sredstva su bile pozvane na okrugli sto u Agora centar gdje su razmjenjivali iskustva i kreirali planove za budućnost. Pozitivna stvar jeste da su grupe koje imaju nekih zajedničkih tačaka ali i one koje to trenutno nemaju, uspjele povezati svoje

djelatnosti te stvoriti zajedničke interese.

Planovi za budućnost

Omladinska banka Tuzla, ponovno otvara poziv aplikantima na finansiranje omladinskih projekata u visini do 700 KM 01.10.2007. godine. Ovaj poziv je upućen svim formalnim i neformalnim grupama mladih ljudi koji imaju ideju i želju da nešto promjene u lokalnoj zajednici što doprinosi boljem životu građana.

***Budite i Vi aktivni! Pospješite život mladih i Vaše zajednice!
Promovišite i Vi Omladinsku banku Tuzla***